

Naalakkersuisut Kalaallit Nunaanni Inatsisartut suleriaasianni § 32 malillugu aalajangiiffigisassatut siunnersuut una matumuuna saqqummiuppaat:

Naalagaaffiit Peqatigiit sulisuisa inuillu Naalagaaffiit Peqatigiinnut attaveqartut isumannaatsuunissaat pillugu nunat tamalaat isumaqatigiissutaannut nammineq tapiliussinnaasamik Danmarkip atuuttussanngortitsineranut Kalaallit Nunaanni Namminersorlutik Oqartussat isumaqataallutik nalunaaruteqarnissaannut aalajangiiffigisassatut siunnersuut.

(Naalakkersuisut Siulittaasuut)

Tungavilersuutit

Naalagaaffiit Peqatigiit sulisuisa inuillu Naalagaaffiit Peqatigiinnut attaveqartut isumannaatsuunissaat pillugu nunat tamalaat isumaqatigiissutaannut nammineq tapiliussinnaasamik Danmarkip Naalagaaffeqatigiit sinnerlugit atuuttussanngortitsineranut Kalaallit Nunaat oqaaseqaateqaqqullugu qinnuigineqarpoq. Taamatuttaaq Danmarkip ilanngunnerminut atortussanik suliaqarnera akuersaaqqullugu aamma Naalagaaffiit Peqatigiit allattuuneranni taakku inissinneqarnissaannut.

Naalagaaffiit Peqatigiit sulisuisa inuillu Naalagaaffiit Peqatigiinnut attaveqartut isumannaatsuunissaat pillugu nunat tamalaat isumaqatigiissutaat (nunat tamalaat isumaqatigiissutaannik taagorneqartussaq) Naalagaaffeqatigiinnut tamanut atuutereerpoq. Periarfissaqassaaq, taamaalioqqusisoqarusunnaranili, isumaqatigiissummut tapiliussami tassani Kalaallit Nunaata nunatut immikkoortutut naaggaarsinnaatitaanissaanut.

Nunat tamalaat isumaqatigiissutaanni oqaatigineqarpoq Naalagaaffiit Peqatigiit sulisuisa nunami suliffigisaminni inatsisit malittassagaat. Peqatigitillugu nunap taassuma taakku isumannaatsuunissaat isumagisassavaa taakkununggalu pinerluttuliornerit eqqartuussivitsigut suliarineqarnissaat qulakkeertassallugu. Nunat tamalaat isumaqatigiissutaat oqaatigineqareersutut Kalaallit Nunaannut atuutereerpoq.

Isumaqatigiissummut tapiliussakkut nunat tamalaat isumaqatigiissutaat aammattaaq Naalagaaffiit Peqatigiit iliuuserisaannut inunnut naakkittartuunissamut naalakkersuinernulluunniit imaluunniit eqqissisaaniarluni ineriartortitsineranut ikiuunnermut imaluunniit inunnut ajornartorsiulersunut ikiuunnermut suliaqartarnissamik siunertaqarnermut atuuttussanngorlugu annertusineqarpoq.

Naalakkersuisut inassutigissavaat Inatsisartut akuersaassagaat Naalagaaffiit Peqatigiit sulisuisa inuillu Naalagaaffiit Peqatigiinnut attaveqartut isumannaatsuunissaat pillugu nunat tamalaat isumaqatigiissutaannut nammineq tapiliussinnaasamik Danmarkip atuuttussanngortitsineranut Naalakkersuisut isumaqataallutik oqaaseqaateqassasut ilanngunnermut atortussanik Danmarkip suliaqarneranut inissinissaanullu akuersaarlutik.

Taamatut oqaaseqarlunga siunnersuut Inatsisartunut akuersaaqqullugu suliaassanngortippara atortussallu agguanneqartut innersuussutigalugit.